

THE UNIVERSITY OF CHICAGO

1964

欽定剿平粵匪方略卷十 壬子年

二年正月初十日

辛酉

上命軍機大臣傳諭賽尙阿鄒鳴鶴曰上年十二月十七日賽尙阿奏報軍務以後迄今又將一月未據續有奏報朕心甚殷盼望前奏南北兩路疊次獲勝連營進逼朕又聞向榮奪據橫嶺俯瞰永安州城城外賊匪紛紛遷入城中是我兵已據勝勢正可乘機合

力一鼓攻克何捷報尙爾遲遲耶現在永安北路已有重兵進壓南路及各路兵力是否不至稍單卽日攻克州城總宜將著名首匪悉數殲擒僅將州城收復仍任匪衆潰圍出走再向他處竄擾尙復成何事體前此攻克之風門坳紫金山等處山陞叢雜久爲該逆巢穴亦宜加意防堵毋任逸匪復行竄踞以致日久稽誅

同日鄒鳴鶴奏言粵西各屬舉行團練前經奏
派右江道升任河南布政使嚴正基總辦一切
並於本省外省各員中擇其實心幹練者十六
人分赴桂林平樂梧州潯州柳州慶遠思恩等
七府會同查辦其鬱林州知州顧諸庚本以辦
團著名卽委該州督催鬱林團務茲據各員會
同該管知府陸續稟報各州縣計里集團按戶

出丁均已一律辦成每邑抽得健壯團丁自數千人至一二萬人不等類皆鍛礪戈矛講求技藝所需經費紳民踴躍公捐各邑少則二三千兩多則二三萬兩不等悉交老成團總經管以供練費並製器械臣恐稟報不盡覈實密加查察並囑嚴正基與局紳龍啟瑞朱琦等另派親信可靠之人擇要密訪互相印證統計六十三

廳州縣中團練已成者實有四十餘處似此人
自爲戰家自爲守旣以保全鄉井並可助官兵
搜捕餘匪奏入報

十一日 壬戌 賽尙阿鄒鳴鶴奏言粵西辦理軍需

自上年七月以來先後奏動截留並部撥應作
軍需支用共銀八百二十餘萬兩內有未解到

者仰荷

聖恩飭令沿途各省督撫臣催趲前進自可陸續到齊
約計用至明歲二月中旬尙可無虞支絀惟一
切用項孔多數難豫計當此軍情緊切埡渠埽
穴未能確有定期兵餉要款不得不先期請撥
以免臨時接濟不及相應請

飭下部臣籌撥銀二百萬兩並飭各該省迅卽撥解

來粵務期及時解到庶於軍務不致有誤奏入
得

旨戶部速議具奏旋經戶部議覆請於山東等省如數
撥解廣西

上從之

賽尙阿又奏言永安大股逆匪經向榮等連日
將各營盤一律移近日夜進攻該逆因我營偏

近兩次來攻俱被兵勇擊敗十二月初二日該
逆千餘三路出巢當卽催令兵勇五路出應兩
次鏖戰傷斃二三百賊斬取長髮賊首二十餘
顆嗣據查明打斃賊目係黃滿乃羅大剛之先
鋒初四初九初十等日疊次進攻十一日該逆
衝出三股約有二千餘衆新潮勇首先接仗官
兵繼上一齊開放槍礮誘令入伏各路截擊傷

斃逆匪二百餘名十三日復斃賊六七十名十六日斃賊百餘並割取首級二十餘顆連日用二千斤大礮乘高轟擊打入賊巢二十日三隊兵勇分路前進槍礮齊施該逆紛紛倒地是日先後斃匪三百餘人帶傷逃去者無數其南路經烏蘭泰於十二月初四日進攻水寶斃賊六七十名初七日復斃賊二十餘名初九日各路

同時並進辰刻至水寶用礮轟擊斃賊五六十
名十二日賊出五六十名兵勇分路迎去又有
百餘賊飛撲而來烏蘭泰截住極力死戰賊勢
稍退南面賊衆與湖北兵對敵甚緊全玉貴等
趕來湖北兵勇氣倍加奮力撲殺賊衆大敗先
後斃賊一百數十名十五日該逆見我兵少傾
巢而出兵勇來往酣戰二十餘次殺賊一百餘

名並紅風帽賊目二名該匪大敗回巢堅壁不出十八日由獨松嶺進攻水竇賊始不出後誘出五六十賊一經追擊退回匪巢許祥光張敬修於初四日出隊分三路而進轟打賊營之西南馮玉衡由峽中進轟打賊營之西許祥光督運大礮六位安設松山之上朱啟仁等帶勇列陣誘敵該匪不出我軍連開五礮均打入賊營

時松山上大礮連環轟擊礮子如雨斃賊甚多
先有黃風帽紅衣賊目在南門望樓上手執黃
旗當經官軍擊斃初九日擒獲匪黨王組榮一
名據供初四日被礮擊斃之賊目係秦軍帥十
七日揀選勁旅以四百人伏於松山以二百人
過河誘敵以四百人伏於峽內以八百人護運
大礮先在松山轟擊令各勇埋伏接應以一二

百人誘其出追果見三賊營各出賊百名搖旗而來旋見各營賊衆絡繹而出共有二三千之多誘賊之勇佯退過河數十匪直入谷口伏勇齊起用連環槍斃賊二十餘名餘匪退出伏勇直追出谷口分兩隊迎擊斃賊數名賊卽奔竄復麾各勇下山分投截擊計是日鏖戰四次斃賊六七十名二十三日向榮出隊悉銳專攻東

礮臺舊縣各路兵勇一齊追趕攻打多時賊衆死拒仍不能入當卽傳令撤回計此戰擊斃賊匪約三四十名擊傷賊匪甚衆烏蘭泰於二十三日攻打賊寨約一時之久賊出六七十名被兵勇打回不敢復出許祥光張敬修於二十三日由能六嶺紅泥嶺而進疊有斬擒臣當以永安逆匪經我兵連次移紮屢獲勝仗雖已漸見

困蹙而土壘礮臺總未攻入卽於二十六日率同隨帶司員等及各將弁白荔浦前赴永安以北距城三里安營賊之礮臺營牆厯厯可數滿擬二十七日卽進兵大舉而陰雨連宵淋漓不止隨與向榮及各鎮將密商機宜以圖攻拔之策俟天氣晴霽卽當鼓勵將士合力併攻奏入

上諭內閣曰永安賊勢日就窮蹙現在賽尙阿已統率